


大智度論

第六十八

二百十四  
端八

48904



British Library  
Acquisition Department  
London

大智度論卷第六十八


龍樹菩薩造

姚秦三藏法師鳩摩羅什譯

端

釋魔事品第四十六

訖四十七品上



慧命須菩提白佛言世尊是善男子善女人  
發阿耨多羅三藐三菩提心行六波羅蜜成  
就衆生淨佛世界佛已讚歎說其功德世尊  
云何善男子善女人求於佛道生諸留難佛  
告須菩提樂說辯不即生當知是菩薩魔事  
須菩提言世尊何因緣故樂說辯不即生是  
菩薩魔事佛言有菩薩摩訶薩行般若波羅  
蜜時難具足六波羅蜜以是因緣故樂說辯  
不即生是菩薩魔事復次須菩提樂說辯不



起當知亦是菩薩魔事世尊何因緣故樂說  
辯卒起復是魔事佛言菩薩摩訶薩行檀波羅  
蜜乃至般若波羅蜜著樂說法以是因緣故  
樂說辯卒起當知是菩薩魔事復次須菩提  
書是般若波羅蜜經時偃僂傲慢當知是菩  
薩魔事復次須菩提書是經時戲笑亂心當  
知是菩薩魔事復次須菩提若書是經時輕  
笑不敬當知是菩薩魔事復次須菩提若書  
是經時心亂不定當知是菩薩魔事復次須菩提  
若書是經時各各不和合當知是菩薩魔事復次  
須菩提善男子善女人作是念我不得是經中  
滋味便棄捨去當知是菩薩魔事復次須菩提

提受持般若波羅蜜讀誦說若正憶念時僂  
僂傲慢當知是菩薩魔事復次須菩提若受  
持般若波羅蜜經親近正憶念時轉相形笑  
當知是菩薩魔事復次須菩提若受持般若  
波羅蜜經讀誦正憶念修行時共相輕慢當  
知是菩薩魔事若受持般若波羅蜜讀誦乃

至正憶念時散亂心當知是菩薩魔事若受  
持般若波羅蜜讀誦乃至正憶念時心不和  
合當知是菩薩魔事須菩提白佛言世尊世  
尊說善男子善女人作是念我不得經中滋  
味便棄捨去當知是菩薩魔事世尊何因緣  
故菩薩不得經中滋味便棄捨去佛言是菩

薩摩訶薩前世不久行般若波羅蜜禪波羅  
蜜毗梨耶波羅蜜羸提波羅蜜尸羅波羅蜜  
檀波羅蜜是人聞說是般若波羅蜜便從坐  
起作是念言我於般若波羅蜜中無記心不  
清淨便從坐起去當知是菩薩魔事須菩提  
白佛言世尊何因緣故不與受記聞說是般  
若波羅蜜時便從坐起去佛告須菩提若菩  
薩未入法位中諸佛不與受阿耨多羅三藐  
三菩提記復次須菩提聞說般若波羅蜜時  
菩薩作是念我是中無名字心不清淨當知  
是菩薩魔事須菩提言何因緣故是深般若  
波羅蜜中不說是菩薩名字佛言未受記菩

薩諸佛不說名字復次頌菩薩是菩薩摩訶  
薩作是念是般若波羅蜜中無我生處名字  
若聚落城邑是人不欲聽聞般若波羅蜜便  
從會中起去是人如所起時念念却一劫甫  
當更勤精進求阿耨多羅三藐三菩提

釋曰一切有爲法各有增上增上者共相違  
相違即是怨賊如水得增上力滅火火得增  
上力則消水乃至草木各有相害何況衆生  
菩薩摩訶薩有大悲心雖不與衆生作怨而  
衆生與菩薩作怨菩薩身有爲法故能作留  
難佛上說菩薩功德所謂諸佛菩薩諸天所  
護而未說怨賊相以佛憐愍故先雖略說今

頌菩薩提請佛廣說留難事佛雖於一切衆生  
一切法心平等以是菩薩能大利益世間故  
說好醜相及利害是道非道留難事佛不令  
行人毀害留難者但令覺知不隨其事何者  
是怨賊略說若衆生法非衆生法能沮壞菩  
薩無上道心非衆生者若疾病飢渴寒熱推押  
墜落等衆生者魔及魔民惡鬼邪疑不信者  
斷善根者定有所得者實定分別諸法者深  
著世間樂者怨賊官事師子虎狼惡獸毒虫  
等衆生賊有二種若內若外內者自從心生  
憂愁不得法味生邪見疑悔不信等外者如  
上說如是諸難事佛揔名爲魔魔有四種煩

惱魔五衆魔死魔天子魔煩惱魔者所謂百  
八煩惱等分別八万四千諸煩惱五衆魔者  
是煩惱業和合因緣得是身四大及四大造  
色眼根等色是名色衆百八煩惱等諸受和合  
名爲受衆小大無量無所有想分別和合名  
爲想衆因好醜心發能起貪欲瞋恚等心相  
應不相應法名爲行衆六情六塵和合故生  
六識是六識分別和合無量無邊心是名識  
衆死魔者無常因緣故破相讀五衆壽命盡  
離三法識斷壽故名爲死魔天子魔者欲界  
主深著世間樂用有所得故生邪見憎嫉一  
切賢聖涅槃道法是名天子魔魔秦言能奪

切賢聖涅槃道法。是名天子魔。魔秦言能奪命者。雖死魔實能奪命。餘者亦能作奪命。因緣亦奪智慧命。是故名殺者。問曰。一五衆魔攝三種魔。何以故。別說四。答曰。實是一魔。分別其義。故有四煩惱魔者。人因貪欲瞋恚。故死亦能作奪命。因緣是近奪命。因緣故。別說天子魔。雜福德業。因緣故。力勢大邪見。力故能奪慧命。亦能作死。因緣是。故別說無常死。力大一切無能免者。甚可畏。馱故。別說。問曰。是魔何以惱亂行道者。答曰。先已廣說是品中。皆有四種魔義。但隨處說。復次三魔不相遠離。若有五衆。則有煩惱。則天魔得其便。五衆煩惱和合。故有天魔。是故須菩提。問佛上。

已讚嘆說菩薩功德今云何是菩薩魔事起  
佛答樂說辯不即生是為魔事者若菩薩摩  
訶薩憐愍衆生故高坐說法而樂說辯不生  
聽者憂愁我等故來而法師不說或作是念  
法師怖畏故不能說或言不知故不說或自  
惟過咎深重故不說或謂不得供養故不肯  
說或謂輕賤我等故不說或串樂故不說如  
是等種種因緣聽者心壞故以不樂說名為  
魔事復次是菩薩憐愍衆生故來欲說法聽  
者欲聞而法師心生欲說而口不能言現是  
魔事如魔入阿難心佛三問而三不答久乃  
說者此中須菩提問世尊何因緣故辯不即

生佛答菩薩行六波羅蜜時難具足六波羅  
蜜所以者何是人先世因緣故鈍根懈怠魔得  
其便不一心行六波羅蜜故樂說辯不即生  
問曰如樂說辯不即生是魔事今樂說辯卒  
起何以復是魔事答曰是法師愛法著法求  
名聲故自恣樂說無有義理如逸馬難制又  
如大水暴長衆穢渾雜是故此中佛自說菩  
薩行六波羅蜜著樂說法是為魔事復次是  
般若波羅蜜為破憍慢故出而書是經者生  
我心憍慢憍慢故身亦高所謂偃僂傲慢書  
是般若波羅蜜時用輕心瞋心戲笑不敬復  
次是般若波羅蜜若一心攝心猶尚難得何

況散亂心書書時從人口受或寫經卷若一  
心和合則得若授者不與如是等種種因緣  
是不和合復次觀看是般若經時品品皆空  
無可樂處作是念我於是經不得滋味便棄  
捨去般若波羅蜜是一切諸樂根本此人不  
得其味是為魔事復次受持讀誦說正憶念  
時偃僂形笑散亂心和合如上說共相輕  
憊者從人受讀誦正憶念時師徒互相輕賤  
書寫經時但有捨去無相輕賤以是故無問  
曰上事中何以但問不得經中滋味不問餘  
者荅曰般若波羅蜜聖人所說與凡人說異  
是故凡夫又不得滋味須菩提意謂般若波

羅蜜是清淨珍寶聚能利益衆生無有過惡  
是人云何不得滋味佛答是人先世不久行  
六波羅蜜故菩薩信等五根薄故不能信空  
無相無作無依止法憍亂心起作是言佛一  
切智何以不與我受記便捨去餘者易解故  
不問須菩提問若尔者何以故不與受記佛  
是大悲應當愍念防護其心不令墮惡佛言  
未入法位人諸佛不與受記所以者何諸佛  
雖悉知衆生久遠事爲五通仙人及諸天見  
人未有善行業因緣可受記若爲受記輕佛  
不信無有因緣云何與受記是故入法位者  
與受記是人名字及聚落處亦如是人從坐

起去隨其起念多少念念却一劫償罪畢還  
得人身甫當復介所劫行

復次須菩提菩薩學餘經棄捨般若波羅蜜  
終不能至薩婆若善男子善女人為捨其根  
而攀枝葉當知亦是菩薩魔事須菩提白佛  
言此尊何等是餘經善男子善女人所學不

能至薩婆若佛言是聲聞所應行經所謂四  
念處四正勤四如意足五根五力七覺分八  
聖道分空無相無作解脫門善男子善女人  
住是中得須陀洹果斯陀含果阿那含果阿  
羅漢果是名聲聞所行不能至薩婆若如是  
善男子善女人捨般若波羅蜜親近是餘經

何以故。須菩提。般若波羅蜜中出生諸菩薩摩訶薩。成就世間出世間法。須菩提。菩薩摩訶薩學般若波羅蜜時。亦學世間出世間法。須菩提。譬如狗不從大家求食。反從作務者索。如是須菩提。當來世有善男子善女人。棄深般若波羅蜜。而攀枝葉聲聞辟支佛所應行經。當知是為菩薩魔事。須菩提。譬如有人欲得見象。見已反觀其跡。須菩提。於汝意云何。是人為黠。不須菩提言。為不黠。佛言。諸求佛道善男子善女人。亦復如是。得深般若波羅蜜。棄捨去取聲聞辟支佛所應行經。須菩提。當知是為菩薩魔事。須菩提。譬如人欲見

大海反求牛跡水作是念大海水能與此等  
不須菩提於汝意云何是人爲黠不須菩提  
言爲不黠佛言當來世有求佛道善男子善  
女人亦如是得深般若波羅蜜棄捨去取聲  
聞辟支佛所應行經當知是亦菩薩摩訶薩  
魔事須菩提譬如工匠若工匠弟子欲擬作  
釋提桓因勝殿而揆則日月宮殿須菩提於  
汝意云何是人爲黠不須菩提言爲不黠如  
是須菩提當來世有薄福德善男子善女人  
求佛道者得是深般若波羅蜜棄捨去於聲  
聞辟支佛所應行經中求薩婆若須菩提於  
汝意云何是人爲黠不須菩提言爲不黠佛

言當知亦是菩薩魔事須菩提譬如有人欲  
見轉輪聖王見而不識後見諸小國王取其  
相貌如是言轉輪聖王與此何異須菩提於  
汝意云何是人爲黠不須菩提言爲不黠須  
菩提當來世有薄福德善男子善女人求佛  
道者得是深般若若波羅蜜棄捨去取聲聞辟  
支佛所應行經持求薩婆若須菩提於汝意  
云何是人爲黠不須菩提言爲不黠當知是  
爲菩薩魔事須菩提譬如飢人得百味食棄  
捨去反食六十日穀飯須菩提於汝意云何  
是人爲黠不須菩提言爲不黠佛言當來世  
有求佛道善男子善女人得聞深般若波羅

蜜棄捨去取聲聞辟支佛所應行經持求薩  
婆若於汝意云何是人爲黠不須菩提言爲  
不黠當知是亦菩薩魔事須菩提譬如人得  
無價摩尼珠反持比水精珠須菩提於汝意  
云何是人爲黠不須菩提言爲不黠佛言當  
來世有求佛道善男子善女人得聞深般若  
波羅蜜棄捨去取聲聞辟支佛所應行經持  
求薩婆若是人爲黠不須菩提言爲不黠當  
知是亦菩薩魔事復次須菩提求佛道善男  
子善女人書是深般若波羅蜜時樂說不如  
法事不得書成般若波羅蜜所謂樂說色聲  
香味觸法樂說持戒禪定無色定樂說檀波

羅蜜乃至般若波羅蜜樂說四念處乃至阿  
耨多羅三藐三菩提何以故須菩提是般若  
波羅蜜中無樂說相須菩提般若波羅蜜不  
可思議相般若波羅蜜不生不滅相般若波  
羅蜜不垢不淨相般若波羅蜜不乱不散相  
般若波羅蜜無說相般若波羅蜜無言無義  
相般若波羅蜜無所得相何以故須菩提般  
若波羅蜜中無是諸法相須菩提若有善男子  
善女人求菩薩道者書是般若波羅蜜經時  
以是諸法散亂心當知是亦菩薩魔事須菩  
提白佛言世尊是般若波羅蜜可書耶佛言  
不可書何以故般若波羅蜜自性無故禪波

羅蜜毗梨耶波羅蜜羴提波羅蜜尺羅波羅  
蜜檀波羅蜜乃至一切種智自性無法若自  
性無是不名爲性無法不能書無法須菩提  
若求菩薩道善男子善女人作是念無法是  
深般若波羅蜜當知即是菩薩魔事世尊是  
求菩薩道善男子善女人用字書般若波羅  
蜜自念我書是般若波羅蜜以字著般若波  
羅蜜當知亦是菩薩魔事何以故世尊是般  
若波羅蜜無文字禪波羅蜜毗梨耶波羅蜜  
羴提波羅蜜尸羅波羅蜜檀波羅蜜無有文  
字世尊色無文字受想行識無文字乃至一  
切種智無文字世尊若求菩薩道善男子善

女人著無文字般若波羅蜜乃至著無文字  
一切種智當知亦是菩薩魔事讀誦說正憶  
念如說修行亦如是復次須菩提求佛道善  
男子善女人書般若波羅蜜時國土念起聚  
落念起城邑念起方念起若聞謗毀其師念  
起若念父母及兄弟姊妹諸餘親里若念賊  
若念旃陀羅若念衆女若念姪女如是等種  
種諸餘異念留難惡魔復益其念破壞書般  
若波羅蜜破壞讀誦說正憶念如說修行須  
菩提當知是亦魔事復次須菩提求佛道善  
男子善女人得名譽恭敬布施供養所謂衣  
服飲食卧牀疾藥種種樂具善男子善女人

書是般若波羅蜜經受讀乃至正憶念時受  
著是事不得書成般若波羅蜜乃至正憶念  
當知是亦菩薩魔事復次須菩提求佛道善  
男子善女人書般若波羅蜜乃至如說修行  
時惡魔方便持諸餘深經與是菩薩摩訶薩  
有方便者不應貪著惡魔所與諸餘深經何  
以故是經不能令人至薩婆若故是中無方  
便菩薩摩訶薩聞是諸餘深經便捨深般若  
波羅蜜須菩提我是般若波羅蜜中廣說諸  
菩薩摩訶薩方便道諸菩薩摩訶薩應當從  
是中求須菩提今善男子善女人求菩薩道  
捨是深般若波羅蜜於魔所與聲聞辟支佛

深經中求方便道當知亦是菩薩魔事

釋曰學餘經捨般若波羅蜜等有人於聲聞師僧中受戒學法初不聞般若波羅蜜或時餘處聞深著先所學法捨般若波羅蜜於先所學法中求薩婆若有聲聞弟子先得般若波羅蜜不知義趣不得滋味以聲聞經行菩薩道有人是聲聞弟子得般若波羅蜜經欲信受餘聲聞人沮壞其心語言是經初後不相應無有定相汝宜捨之聲聞法中何所不有六足阿毗曇及其論議分別諸法相即是般若波羅蜜八十部律即是尸羅波羅蜜阿毗曇中分別諸禪解脫諸三昧等是禪波羅

蜜三藏本生中讚歎解脫布施忍辱精進即是三波羅蜜如是等種種因緣捨般若波羅蜜於聲聞經中求薩婆若如人欲得堅實好木捨其根莖而取枝葉雖是木名而不中用復次般若波羅蜜是三藏根本得般若波羅蜜已爲度衆生故說餘事是故名枝葉復次聲聞經中雖說諸法實相而不了了般若波羅蜜經中分明顯現易見易得如人攀緣枝葉則墜落若捉莖幹則堅固若執聲聞經則墮小乘中若持般若波羅蜜易得無上道是故說捨根基取枝葉問曰三十七品三解脫門般若經中亦有今何以故但名聲聞辟支

佛經答曰摩訶衍中雖有是法與畢竟空合  
心無所著以不捨薩婆若大悲心爲一切衆  
生故說聲聞經則不介爲小乘證故復次菩  
薩行般若波羅蜜故能成就世間出世間法  
是故菩薩若求佛應當學般若波羅蜜譬如  
狗爲主守備應從主索食而反於奴客求菩  
薩亦如是狗喻行者般若波羅蜜喻主人般  
若中有種種利益而捨求餘經佛欲今分明  
易見故說譬喻象大海帝釋殿轉輪聖王無  
價寶亦如是問曰五欲生五蓋以五蓋覆智  
慧故不應樂說何以故樂說餘六波羅蜜乃  
至無上道而言不如法答曰不如法者不如

般若波羅蜜實相般若波羅蜜實相中無定相法云何可樂說若有定相則心著樂說諸佛及菩薩以大悲心故爲衆生說法不著語言用無所得法示衆生畢竟空相般若波羅蜜是人書讀誦等以深著心取六塵相乃至無上道故言不如法問曰若般若波羅蜜畢竟空無所有法不可書讀誦等如是則不應有魔事答曰畢竟空無所有亦非般若波羅蜜相何以故是魔事此中說若是人知無所有是般若波羅蜜相即是魔事若用文字書般若波羅蜜自知我書般若波羅蜜有此著心即是魔事若人知般若波羅蜜不以著

心書讀誦等若有來破者是爲破般若波羅蜜  
復次內有煩惱魔外有天子魔是二事因緣  
故書般若波羅蜜乃至修行時壞般若波羅  
蜜念起者所謂念此國土不安隱彼國土豐  
樂聚落城邑方亦是或聞謗毀其師捨般  
若波羅蜜欲助師除滅惡名或聞父母疾病  
官事或念賊恐怖欲發心誦餘處旃陀羅亦  
如是與賊旃陀羅共住則發瞋恚與衆女姪  
女共住故姪欲心發如是等種種因緣破壞  
般若波羅蜜菩薩覺知當莫念莫說或書般  
若波羅蜜時鈍根者於多恭敬供養事中受  
著自念我能書能隨行故有是著是利養即

是魔事或有利根者魔或思惟是菩薩不著  
世間樂一心受般若波羅蜜此人不可沮壞  
我今當以聲聞深經轉其心使成阿羅漢佛  
言聲聞經雖深不應貪著譬如燒然金丸色  
雖妙不可捉若菩薩無方便不大利根得是  
經歡喜是空無相無作盡苦本何復過是便  
捨般若波羅蜜亦是魔事何以故此中佛說  
因緣於般若波羅蜜中廣說諸菩薩摩訶薩  
方便道所謂觀聲聞辟支佛道而不證以大  
悲心行三解脫門故譬如人以蘇和毒毒勢  
則歇不能害人般若亦如是菩薩於般若中  
求無上道易得於餘經則難如但服毒是故

不應從聲聞經中求菩薩道

大智論釋兩不和合品第四十七上

復次須菩提聽法人欲書持般若波羅蜜讀  
誦問義正憶念說法人懈墮不欲爲說當知  
是菩薩摩訶薩魔事須菩提說法之人心不  
懈墮欲令書持般若波羅蜜聽法者不欲受

之二心不和當知是爲魔事復次須菩提聽  
法人若欲書持般若波羅蜜讀誦乃至正憶  
念說法者欲至他方當知是爲魔事須菩提  
說法人欲令書持般若波羅蜜聽法者欲至  
他方二心不和當知是爲魔事復次須菩提  
說法人貴重布施衣服飲食卧具醫藥資生

之物聽法人少欲知足行遠離行攝念精進  
一心智慧兩不和合不得書般若波羅蜜受  
持讀誦問義正憶念當知是為魔事須菩提  
說法人少欲知足行遠離行攝念精進一心  
智慧聽法者貴重布施衣服飲食卧具醫藥  
資生之物兩不和合不得書持般若波羅蜜  
讀誦問義正憶念當知是為魔事復次須菩  
提說法者受十二頭陀一作阿蘭若二常乞  
食三納衣四一坐食五節量食六中後不飲  
漿七塚間住八樹下住九露地住十常坐不  
卧十一次第乞食十二但三衣聽法人不受  
十二頭陀不作阿蘭若乃至不受但三衣兩

不和合不得書持般若波羅蜜讀誦問義正  
憶念當知是為魔事須善提聽法者受十二  
頭陀作阿蘭若乃至受但三衣說法人不受  
十二頭陀不作阿蘭若乃至不受但三衣兩  
不和合不得書持般若波羅蜜讀誦問義正  
憶念當知是為魔事

釋曰一切有為法因緣和合故生眾緣離則  
無譬如鑽燧求火有鑽有母二事因緣得火  
書寫般若乃至正憶念亦是內外因緣和  
合故生所謂師弟子同心同事故乃得書成  
是故佛告須善提聽法人信等五善根發故  
欲書持般若乃至正憶念說法者五蓋覆心

故不欲說問曰若五蓋覆心故不欲說何以  
作師答曰是人著世間樂不觀空無常雖能  
心知口說不能自行弟子雖必欲行而不能  
知故更無餘處必諮此人或時師悲心發故  
欲令書持般若弟子信等五善根鈍不發故  
著世間樂故不欲受書持乃至正憶念問曰  
若不欲受持何以名聽法者答曰少多聽受  
讀誦不能究竟成就故但名聽法若二人善  
心共同能得般若波羅蜜若不同則不能得  
是名魔事內煩惱發外天子魔作因緣離是  
般若菩薩應覺是魔事防令不起若自失當  
具足若弟子失當教令得復次師或慈悲心

薄捨弟子至他方或不冝水土四大不和或  
善法無所增益或水旱不適或土地荒亂如  
是等種種因緣故至他方弟子亦種種因緣  
不能追隨貴重利養者如上五蓋覆心等復  
次是二人皆有戒而一人以十二頭陀  
莊嚴戒一人不能問曰一人何以故不能答  
曰佛所結戒弟子受持十二頭陀不名爲戒  
能行則戒莊嚴不能行不犯戒譬如布施能  
行則得福不能行者無罪頭陀亦如是是故  
兩不和合則是魔事十二頭陀者行者以居  
家多惱亂故捨父母妻子眷屬出家行道而  
師徒同學還相結著心復媯亂是故受阿蘭

若法令身遠離憤內住於空閑遠離者最近  
三里能遠益善得是身遠離已亦當令心遠  
離五欲五蓋若受請食若衆僧食起諸漏因  
緣所以者何受請食者若得作是念我是福  
德好人故得若不得則嫌恨請者彼爲無所  
別識不應請者請應請者不請或自鄙薄懊

惱自責而生憂苦是貪憂法則能遮道僧食  
者入衆中當隨衆法斷事僨人斷理僧事處  
分作使心則散亂妨廢行道有如是等惱亂  
事故受常乞食法好衣因緣故四方追逐墮  
邪命中若受人好衣則生親著若不親著檀  
越則恨若僧中得衣如上說衆中之過又好

衣是未得道者生貪著處好衣因緣招致賊  
難或至奪命有如是等患故受弊納衣法行  
者作是念求一食尚多有所妨何況小食中  
食後食若不自損則失半日之功不能一心  
行道佛法爲行道故不爲益身如養馬養猪  
是故斷數數食受一食法有人雖一食而貪  
心極噉腹脹氣塞妨廢行道是故受節量食  
法節量者略說隨所能食三分留一分則身  
輕安隱易消無患於身無損則行道無廢如  
經中舍利弗說我若食五口六口足之以水  
則足支身於秦人中食可十口許有人雖節量  
食過中飲漿則心生樂著求種種漿菓漿蜜

漿等求欲無厭不能一心修習善法如馬不  
著轡勒左右噉草不肯進路若著轡勒則噉草  
意斷隨人意去是故受中後不飲漿無常空  
觀是入佛法門能厭離三界冢間常有悲啼  
哭聲死屍狼藉眼見無常後或火燒鳥獸所  
食不久滅盡因是屍觀一切法中易得無常  
相空相又冢間住若見死屍臭爛不淨易得  
九想觀是離欲初門是故受冢間住法不淨  
無常等觀已得道事辦捨至樹下或未得道  
者心則不大厭取是相樹下思惟如佛生時  
成道時轉法輪時般涅槃時皆在樹下行者  
隨諸佛法常處樹下如是等因緣故受樹下

坐法行者或觀樹下如半舍無異蔭覆涼樂  
又生愛著我所住者好彼樹不如如是等生  
漏故至露地住作是思惟樹下有二種過一  
者雨漏濕冷二者鳥屎汙身毒虫所住有如  
是等過空地則無此患露地住則著衣脫衣  
隨意快樂月光遍照空中明淨心易入空三  
昧身四儀中坐為第一食易消化氣息調和  
求道者大事未辦諸煩惱賊常伺其便不宜  
安卧若行若立則心動難攝亦不可久故受  
常坐法若欲睡時脇不著席行者不著於味  
不輕衆生等心憐愍故次第乞食不擇貧富  
故受次第乞食法行者少欲知足衣趣蓋形

不多不少故受三衣白衣求樂故多畜種種  
衣或有外道苦行故裸形無恥是故佛弟子  
捨二邊處中道行住處食處常用故事多衣  
不須日日求故略說是十二頭陀佛意欲令  
弟子隨道行捨世樂故讚十二頭陀是佛意  
常以頭陀為本有因緣不得已而聽餘事如  
轉法輪時五比丘初得道白佛言我等著何  
等衣佛言應著納衣又受戒法盡壽著納衣  
乞食樹下住弊棄藥於古四聖種中頭陀即  
是三事佛法唯以智慧為本不以苦為先是  
法皆助道隨道故諸佛常讚歎

大智度論卷第六十八

釋第四十六品訖  
第四十七品上

端

偃蹇

上居於顯反下

傲慢

上吾告反

奪

奪

俗徒活反上

串習

上古患反

黠

反開八

揆則

上

癸莖幹

反下正

旦耕反

歇

反許謁

鑽燧

反上子官反

憤

丙

上俱妹反

儻人

上必

纏

音脇

反虛業



